

## **Póstrowne słowo Budyšin 26.01.2019**

### **Serbski wosadny zwjazk**

Lube sotšy a bratšy,

witše jo tšeša nježela pó tšoch kralach. Stowim was z gronkom na tu nježelu

z ewangelija Lukasa: „Wóni budu pšís wót pódzajtša a pódwjacora, wót pódpołnocy a pódpołdnja a budu sejžeš za blidom w Bóžem kralojstwje.“ Z tym pšinjasom Wam wutšobne póstrowy wót pódpołnocy, pótakem wót sotšow a bratšow Serbskeje wósady Dolneje Łužyce.

Som měnjecy, až jo wjelgin wažne, až my ewangelske Serby w cerkwjoma EKBO a sakskego kraja woplěwamy intensiwne kontakty. Tak smy to žaržali w zachadnosći, na pšikład w lěše jubileja reformacije, a tak to dej teke nadalej byś.

My pšijěžomy raži na waše zarědowanja. Ja se wósebnje juž wjelgin wjaselim na Serbski cerkwiny žen w Budyšinje w juniju. Za wurědnje wažnje mam wšak gromadne zarědowanja, kenž su myslone za familije a młodu generaciju. Mam na mysli na pšikład Serbski ewangelski kónc tyženja w Hainewalže a familijowy swěžeń w Wujěžku. Za to teke w Dolnej Łužycy mócnje wabimy, dokulaž take zmakanja pokazuju našym Dolnoserbam, kake rěcne rummy su móžne.

Bužćo pak teke wutšobnje witane do nas. Som nowe wudaše našogo łopjena „Nowy wósadnik“ sobu pšinjaš, žož cerkwina pratyja Serbskeje wósady w Dolnej Łužycy stoj nutš. Teke plakat z gronkom lěta „*Pytaj měř a hoń za nim.*“ móžošo sobu wzeš. Jadne pšispomnješe k zapšimješeju „Serbska wósada“, kenž w slědnych lětach wěc a wěcej wužywamy. W Dolnej Łužycy mam drugu organizaciju ako wy w Sakskej cerkwi. Taki zwězk serbskich wósadow ako how njejo móžny pla nas. Ako Serbska wósada rozmějomy dobrowólne zgromažeństwo wšykných, kenž maju zajm za Bóže słowo w dolnoserbskej rěcy, do našych namšow a zarědowanjow woglěduju a to pódpěruju. Wětšu part aktiwitow organizěrujo žěłowa kupka „Serbska namša“. Našo towaristwo to wšo spěchujo. Cu na to pokazaš, až Spěchowańske towaristwo za serbsku rěc w cerkwi wóswěši lětos 25. jubilej wobstaša. Pší tej góžbje planujomy zasej wulět z busom do pólskeje Łužyce a wósadny swěžeń k swětkam w Gołkojcach k cesći 200. pósmjertneho lěta fararja Fryca, toho pšeložowarja Starego testamenta.

Teliko wó našom žěle w Dolnej Łužycy. Pšosymy pak wó Bože žognowanje za kužde serbske słowo a cynjenje w našyma cerkwjoma ako w Dolnej, tak teke w Górnej Łužycy. Bog buž z wami.

H. S. Leipner

Pšedsedař Spěchowańskego towaristwa za serbsku rěc w cerkwi z. t.